

**BOSNA I HERCEGOVINA
FEDERACIJA BOSNE I HERCEGOVINE
HERCEGOVAČKO-NERETVANSKI KANTON
OPĆINSKI SUD U MOSTARU**

Broj.058-0-Su-2369-3/22

Mostar, 26.12.2022. godine

Predsjednik Općinskog suda u Mostaru Bajro Avdić, na osnovu člana 31. stav 1. Zakona o sudovima u Federaciji Bosne i Hercegovine (Službene novine F BiH broj: 38/05, 22/06, 63/10, 72/10, 7/13, 52/14 i 85/21), člana 8. stav 1. tačka d) i j) Pravilnika o unutrašnjem sudskom poslovanju (Službeni glasnik broj: 66/12, 44/14, 54/17, 60/17 i 30/18), te člana 5. Uredbe o naknadi za vrijeme provedeno u pripravnosti za rad sudija i tužilaca i naknadi za odvojeni život od porodice i smještaj u mjestu rada tužilaca, sudija i stručnih saradnika u sudovima u Hercegovačko-neretvanskom kantonu i Kantonalnom tužilaštvu HNK („Službene novine HNK“ broj: 9/22), donosi sljedeću:

ODLUKU

**o naknadi za vrijeme provedeno u pripravnosti za rad sudija i
naknadi za odvojeni život od porodice i smještaj u mjestu rada sudija i stručnih
saradnika Općinskog suda u Mostaru**

Član 1.

(Predmet Odluke)

Ovom Odlukom se uređuje način i uslovi provođenja Uredbe o naknadi za vrijeme provedeno u pripravnosti za rad sudija i tužilaca i naknadi za odvojeni život od porodice i smještaj u mjestu rada tužilaca, sudija i stručnih saradnika u sudovima u Hercegovačko – neretvanskom kantonu i Kantonalnom tužilaštvu HNK („Službene novine HNK“ broj: 9/22), (u daljem tekstu: Uredba).

Član 2.

(Pripravnost za rad)

- (1) Sudiji ovog Suda pripada naknada na osnovu vremena provedenog u pripravnosti za rad srazmjerno vremenu trajanja pripravnosti za rad.
- (2) Pripravnost za rad ne ulazi u radno vrijeme i predstavlja poseban oblik rada, kada ne mora biti prisutan na radnom mjestu, ali mora biti dostupan radi obavljanja poslova iz svoje nadležnosti na službeni mobitel suda koji preuzme pri stupanju na pripravnost za rad.
- (3) Pripravnost za rad radnim danom traje 16 sati, a neradnim danom 24 sata.
- (4) Pravo na naknadu iz stava 1. ovog člana se ostvaruje dostavom Odluke o rasporedu pripravnosti za rad predsjednika Suda i izvještaja o provedbi te Odluke Ministarstvu pravosuđa, uprave i lokalne samouprave Hercegovačko – neretvanskog kantona.

Član 3.

(Naknada za pripravnost za rad)

- (1) Mjesečna naknada za pripravnost za rad sudije iznosi 10% od satnice redovnog rada sudije u tekućem mjesecu za svaki sat vremena proveden na pripravnosti za rad.
- (2) Mjesečni raspored pripravnosti za rad kojim se određuje potreban broj osoba koje će biti u pripravnosti određuje odlukom predsjednik Suda.
- (3) Raspored mora biti ravnomjerno raspoređen, u odnosu prema broju sudija ovog Suda i broju dana na koji se raspoređuje pripravnost.
- (4) Sud će uspostaviti službene evidencije o satima provedenim u pripravnosti za rad.
- (5) U pripravnosti može biti maksimalno jedan sudija.

Član 4.

(Naknada za vrijeme pripravnosti)

- (1) Kada za vrijeme trajanja pripravnosti za rad sudija obavlja poslove i zadatke svog radnog mjesta u zgradi Suda, a radi se isključivo o postupanju u predmetu s oznakom „Kpp“ što podrazumijeva odlučivanje o prijedlogu tužioca o određivanju pritvora i prekršajnim predmetima za koje ovlašteni organ obavijesti sudiju da je u pitanju hitni postupak, ima pravo na povećanje osnovne plate srazmjerno vremenu provedenom na radu u sljedećim slučajevima:

1.	Prekovremeni rad	za 25% (dvadesetpet posto) od osnovne plate
2.	Rad subotom i nedjeljom	za 15 % (petnaest posto) od osnovne plate
3.	Rad na praznike koji su	
4.	po zakonu državni praznici	za 40 % (četrdeset posto) od osnovne plate
5.	Noćni rad	za 25% (dvadesetpet posto) od osnovne plate

- (2) Za ostvarivanje prava na povećanje osnovne plate iz stava 1. ovog člana sudija je obavezan predsjedniku Suda prethodno podnijeti izvještaj o provedenim radnjama u konkretnom predmetu i vremenu provođenja istih, a predsjednik Suda u svakom konkretnom slučaju cijeni osnovanost provođenja tih radnji van redovnog radnog vremena. Sudija može podnijeti izvještaj odmah po okončanju provedenih radnji, a najkasnije po okončanju pripravnosti za rad tokom koje je te radnje provodio.
- (3) Naknade na osnovu člana 3. i člana 4. Ove Odluke se međusobno isključuju.

Član 5.

(Rješavanje o naknadi za pripravnost za rad i rješavanje o naknadi za rad u vrijeme pripravnosti)

- (1) Odluku o rasporedu pripravnosti za rad donosi predsjednik suda, te se ista obavezno dostavlja računovodstvu Suda, koje će prema istoj, vršiti obračun mjesečne naknade za pripravnost.
- (2) Odluka predsjednika Suda o osnovanosti provođenja radnji van radnog vremena koje je sudija naveo u izvještaju iz člana 4. stav 2. ove Odluke, obavezno se dostavlja Odsjeku računovodstva Suda, koje će, u skladu s istom, vršiti obračun naknade za rad u vrijeme pripravnosti.

Član 6.

(Naknada za odvojeni život od porodice i smještaj u mjestu rada)

- (1) Sudije i stručni saradnici koji obavljaju sudsku funkciju ovog Suda čije je mjesto prebivališta udaljeno više od 70 (sedamdeset) kilometara od mjesta ovog Suda, imaju pravo na naknadu troškova za odvojeni život i smještaj u mjestu rada u visini od 250,00 KM mjesečno.
- (2) Za ostvarivanje navedenog prava potrebno je da sudija odnosno stručni saradnik podnese predsjedniku Suda zahtjev i dokaz o mjestu prebivališta.

Član 7.

(Objavljivanje i stupanje na snagu)

Ova Odluka stupa na snagu danom dobivanja saglasnosti Ministarstva pravosuđa uprave i lokalne samouprave HNK na istu, te će se objaviti na oglasnoj ploči i web stranici Suda, a ima se primjenjivati od 01.09.2022. godine.

